

BAYRAKLARI NEÇİN 20-dä KALDIRDILAR?

Gagauzların eni istoriyasında peydalandıydı bir yortu, ani hepsimizi birleştirärdi – Gagauz Respublikasının Günü. Birleştirärdi ölä, niçä birleştirdilər Gagauziyanın insannarı 22 yıl geeri, açan Gagauz Respublikasını kurmaa deyni kalkındıydılar.

Gagauz Respublikasının Günü, Harman ayın (avgust) 19-zu, – **bişmäk yortusuydu**. Şindi sa – **köşä yortusu** oldu. Taa doorusu: onu köşä yortusu yapmaa karar aldılar onnar, Gagauziyanın bütünkü bürokratları. Bu iş **maamilä surat geler**, ama bakın niçä adım-adım “SUSLOVcuklar” düşünmüşlər **gagauzların birleşmesi-ni darı gibi daatmaa**:

- İltân bu büyük Gününe karşı Komrat kultura Evin remontunu başlâdêrlar (olmasın neredä bilä kutlamaa deyni);

- Sora Gagauz Respublikasının Gününe karşı yapılmaa plannanan Bütündünnä gagauzların III-cü Kongresini Çadıra geçirmää tekilif ederler;

- Yalancı bir “birleştirici” sebep bulup Kongresi Harman ayından (avgust) 17-18 günnerindän Kasım ayı 2-3-nä atêrlar. (**Kasım yortusuna da diil!!!**);

- Karar alınêr Gagauz Respublikasının Gününi herkezi **kendi küüyündä** hem **kasabasında** kutlasın;

- Gagauziya girişindä (*oku 4-cü sayfa-da*) Moldovanın hem Gagauziyanın bayrakları Gagauz Respublikasının yortusundan sora, bir gün geçtiynän kaldırdêrlar.

Sanmêêrim, ani bölä bir plan var niçä peydalansın o insannarın kafalarda, ani yaşmalarında birkaç asker kiyadı okudular. Yumulu gözlä da görüner, ani bu fikir ne-soysa “**analitik merkezindä**” yaratılmış sora da kafaya yutturulmuş. Ama neçin?

Cuvap belli: **Gagauzları, Gagauzluu, Gagauz Simvollarını yok edip**, genä gagauzların **BELİNİ kırmaa!**

Acaba bunun sebebi korkaklık hem yalancılık mı? Zigmund FREYD demiş, ani bir insan korkak hem yalancıysa sa, **bunun köklerini onun uşaklında arramıyın**. Aaradık – Zigmund FREYD haklı!

Gagauzlarda var bir laf – **pızli**. Ölä deerlär uşaa, ani herbir iştân korkêr. Acaba Gagauziyadaki pızlilär Gagauz Respublikasının Günündän mi korkêrlar? Osaydı kendi görünmeyän saabilerindän mi?

Harman ayın (avgust) 20-dä Gagauziya girişindä Moldovanın hem Gagauziyanın bayraklarını kaldırılmasınan ilgili cümneyä “aşlı gibi” yalannarı yutturdêrlar. Bir yalanı gagauzlara – “**bayrakları Gagauz Respublikasının yortusu çerçevesindä kaldırdık**”. Birini da Kişineva – «**флаги подняли не в день Гагаузской Республики, а позже**».

Gagauz Respublikasının Gününi oyuncaa çevirdilər. Gagauz milleti ne uşak mı da bu **BÜÜK** hem **AYOZLU** Günnän **oyuncak gibi** oynasın?

Kim bu vasil oyuncakların ardında durêr? Osa bu oyuncak diil mi, ama **büük bir geopolitika** oyunu mu? Bu oyunun ardında **taa büyük bir iş mi yatêr** da biz onu taa derinädän annayamêêrız mı? **Be-kim gagauzları başka bir iş için kurban hazırlêêrlar?** Allah bilir! O sa şeytan mı?

— *Todur ZANET.*

KONGAZDA FUTBOL VETERANNARINI ANDILAR

Beş yıl geeri, açan Kongaz küüyün primarıydı Demyan Nikolaeviç KARASENİ, primariya aldı karar, ani her yıl Kongaz küüyün futbol veterannarını anmak için futbol maçları yapmaa. Bu yıl ölä maç oldu Harman ayın (avgust) 5-dä Kongazın stadionunda. Oynadılar Kongaz küüyün hem Moldovanın futbol veterannarı. Maç bitti 1:3. Ensedi Moldovanın futbol veterannarı.



Bölä bir gözäl maç hazırlamaa deyni sponsor oldular iki kardaş – Demyan Nikolaeviç KARASENİ, GHT Başın yardımcısı hem Mihail Nikolaeviç KARASENİ, biznesmen.

Sabaalän, maçı hazırlayannar hem futbol veterannarı gittilär mezarlaa da koydular çiçek raametli olan futbolcuların mezarlarına.

Maçın başlamasından öncä açılış mitingi yapıldı. Stadionda bulunanların önündä İvan İvanoviç İKİZLİ, maçın organizatorlarından birisi, okudu Kongazın hem Moldovanın raametli olan futbol veterannarın laablarını, angılarına baaşlanardı bu maç: Kongazdan: V.A. Kornienko, N.A. Şveţov, G.İ. Frangu, İ.P. Sıngu, S.G. Gümüş, F.İ. Kuliş, İ.İ. Tulba, N.F. Kuliş, M.K. Kazancı, G.F. Çebanov, P.İ. Arnaut, N.V. Harçu, D.V. Harçu, D.F. Bargan, İ.İ. Beü, İ.F. Zanet, P.G. Terzi, B.B. Hahuläk, G.G. Karasenı, N.İ. İkizli,

(**Sonu 2-ci sayfada.**)

Gagauz Respublikasının kurulma Gününe 22-ci yıldönümünä O OLMAYDI RESPUBLİKAMIZ DA OLMAYACEYDI



Harman ayın (avgust) 19-da Gagauziya hem gagauz halkı kutlêêr kendi en paalı yortusunu – Gagauz Respublikasının kurulmasının 22-ci yıl dönümünü. Büyük hem ayozlu bir yortu.

Ama, son yıllarda Gagauziyada kuvettä bulunannar bu yortuyu maasuz istämeerlär tanımaa, açıktan kutlamaa hem saygı göstermää o insannara, angıların kuvedinnän, terinnän, kanınnan, kahramannınnan hem girginniinnän o Respublika kuruldu.

Taa da beter, onnar hepsini yapêrlar, silmää deyni o halk kahramannarın adlarını da onnarın erinä yalancı istoriyaya yazmaa kendilerini hem o kişileri, kim korkak palı gibi, saklanıp maskaların altında, insannarın ardında, Gagauz Respublikasına hem gagauzlara karşı işlârdi.

Ama vakit herbir işi erinä koyêr, dooruluu aslıya çıkarêr, gübürleri sellän alêr. Zerä denilmiş ye: “**Sular gider, taşlar kalêr!**” Yazık, ani bu biraz geç olêêr. Dooruluk taa tez üzä çıksın deyni, bütün annadacez o adamnarın birisi için, angısı olmaydı Gagauz Respublikası da olmayaceydı. Belliki o adam gagauz halk kahramanı – **İvan Georgi-eviç BURGUDJİ.**

(**Taa ötää 3-cü sayfada.**)

“EUROPEAN AIRCOMBAT SCALE GAMES” MOLDOVADA

Harman ayın (avgust) 15-19 günnerindä Moldovanın Vadul-lui-Voda aerodromunda “Radiokomandalı eroplan modellerin serbest düüşündä” Evropa Çempionatı geçti. Onun lozunguydu – “Moldova gökündä düüşelim!”

Çempionatta pay aldı 56 pilot Avstriyadan, Belarusiyadan, Çehiyadan, Estoniyadan, Germaniyadan, Moldovadan, Rusiyadan, Slavakiyadan hem Ukraynadan. Yarışmalar I-ci hem II-ci Dünnä cenklerin aeroplannarının maketlerin arasında oldu. Maketlar yapılyıldılar 1:8 hem 1:12 masştabında.

Moldova gökündä büyük düüşmelerdän sora Evropa çempionu da belli oldu – Çehiyadan pilot Patrik SVIDA. Çempionatta Moldova komandasında pay aldılar gagauzlar da: Aleksandr DANC (15-ci er) hem Canabisinin oolu Stepan (43 er).

Not. Çempionatı hazırladılar Halklar arası “ACES İnternaşional” kuruluşu hem onun Moldovadaki bölümü. Yardımcı oldular Moldovanın korunmak ministerlii, Rusiyanın Moldovada bilim hem kultura Merkezi. Moldova komandasının baş sponsoru oldu “Moldcell” kuruluşu.



KONGAZDA FUTBOL VETERANNARINI ANDILAR

(Çeketmesi 1-ci sayfada).

D.S. Frangu, G.N. Karaseni. Moldova-dan: Viktor BOȚAN, Mihail AFONIN, Yuriy MİTEREV, Boris ÇEBOTARI.

cerikli. Bu iş taa pek üzä çıktı ikinci taymda. Bezbelli o üzerä da matçı Kongaz futbolcuları 1:3 tarattılar.

Kongaz küüyün futbol veteranna-

TERZİya hem Veçeslav KATKOva verildi "Altın butsa" kubokları. Sponsorların adından verdi onnarı Mihail ESİR, Kongaz primarın yardımcısı.

Matçın en yaşlı oyuncularına Anatoliy ORMANCIya hem Nikolay SERGEEVa baaşısları sponsorların adından verdi Nikolay DUDOGLU, Komrat kasabasının primarı.

Matçın en islää vratarlerinä Nikolay GROZDEVa hem Vasiliy KOŞELEVa baaşısları sponsorların adından verdi Mihail GROZDEV.

Bundan kaarä hepsinä kim katıldı bu matça verildi maasuz turnir için hazırlanmış şapkalar hem vımpelları. Vımpeln üstündä yazılıydı raametli olan kongazlı futbolcuların laabları.



Kongazın "Promkombinat" komandası, 1952-ci yıl. (soldan) Vasiliy Andreeviç KORNİENKO (1), İvan Zaharoviç KAZANCI (2), ? (3), Gavril İlyiç FRANGU (4), İvan Födoroviç ZANET (5), Anatoliy PLEHOV (6), ? (7), Nikolay Vasilyeviç HARÇU (8), ? (9), Födor İosipoviç KULİŞ (10), Vasiliy Radionoviç KARASENİ (11).

Mitingta söz tuttular matçın sponsorları Demyan KARASENİ hem Mihail KARASENİ, Mihail ESİR, Kongaz primarın yardımcısı hem Mircea KOJOKARY, Moldova Futbol Federatıyasının (MFF) zaametçisi.

Mircea KOJOKARY açıkladı, ani MFF baaşladı Kongaz futbolcularına forma hem futbol toplarını. Bu baaşısları Canabisi verdi Kongaz futbol komandasının kapitanına Nikolay ÇEBANOva. Bundan kaarä o baaşladı MFF şarflarını burada bulunan en yaşlı futbolculara Konstantin HARÇUya, Vasiliy JEJUya, Georgi PALİKa, Nikolay MİNKUya, İvan KULİŞa hem baaşladı birär top futbol veterannarına Pötr DRAGNİya, Demyan KARASENİya hem Vasiliy KARASENİya.

Moldovanın hem Gagauziyanın gimnarından sora, stadionda bulunannar bir minutluk yas tuttular raametli olan furbolcuların anması için.

Sora matç başladı. Matçın ilk payında kendilerini taa kuvetli gösterdilər kongazlı futbolcular. Ama belliydi, ani Moldovanın futbol veterannarı taa be-

rını anmak için futbol matçından sora kuboklar hem baaşıslar verildi. Matçın baş kuboonu Moldova futbol veterannarı kabletti. Kuboo hem medalileri bu komandaya verdi matçın sponsoru Mihail KARASENİ.

İkinci kobok verildi kongazlılara. Kuboo hem medalileri bu komandaya verdi matçın ikinci sponsoru Demyan KARASENİ.

Matçın en islää furbolcularına Pötr



Matçtan sora futbol veterannarını anmak için hepsi katılannara bir anmak masası koyuldu.

PATRETTÄ: (1-ci sayfada) Kongaz futbol komandasının kapitanına Nikolay ÇEBANOV kableder kuboo Demyan KARASENİN ellerindän.



Gagauz Respublikasının kurulma Gününün 22-ci yıldönümünə O OLMAYDI RESPUBLİKAMIZ DA OLMAYACEYDI

(Çeketmesi 1-ci sayfada).

22 yıl geeri, açan deyârdin Vani BURGUDJİ herkezi bilârdi, ani laf gider girgin hem korkusuz bir gagauz için, ani devletliimiz için hazırıdı, hem şimdi da hazır, canını kurban vermää.

Ozaman, o uzak hem potreli yıllarda, nicä şimdi da, İvan BURGUDJİnin Allahtan baaşlanmış hepsi vergileri faydaylan izmet ettilär hem edirlär halkımıza hem devletliimizä.

Açan 1989-cu yılda läâzımdı gagauzları ayaa kaldırmaa – o ilkin koşuldu bu işä. Açan läâzımdı “Gagauz Halkı” akıntısını kurmaa hem gagauzların milli akıntılarını bireri toplamaa – o ilkin bu iş içinä atıldı. (Sora akıntıya geldilär onnar, kim yazardılar «*кучка экстремистов хотят создать автономию*», onnar kimi KGB hem raykom partiyi yolladı, da kim şimdi da, başkancıkların yanında yaltaklanıp, gagauz halkın kanını hem parasını süzeer).

İvan BURGUDJİ ilkin annadı, ani Gagauz Respublikasını yok nicä kurmaa herliim buna juridika temeli hem asker kuvedi koyulmarsa. Onuştan o, suvayıp ennerini, juridika kanonnarına hem halklararası haklara görä hazırladı hem temelleştirdi gagauzların devletlää hakkını. O yaptı hepsini, ani gagauzlar kursunnar kendi askerini – “Bucak” batalyonunu.

Te ne annadêr “Gagauz Halkı” akıntısını kurulması için hem “Bucak” batalyonunu için bilim filmında “Gagauzlar hem Gagauzluk” (filmin avtoru hem rejisoru Todur ZANET) kendisi İvan BURGUDJİ: “*Toplandılar hepsicü “Millet sancısı”, “Birlik”, “Vatan” hem da “Gagauz Halkı” da onun adını koyduk “Gagauz Halkı”. Toplandık nicä bir yumuruk hepsimiz da dedik, ani olsun – GAGAUZ DEVLETİNİ*



kuracez. Kurduk batalyon “Bucak”. Da olmaydı batalyon “Bucak” onnar bir gecedä alaceydılar öndercilerini da bittiydi Gagauz Respublikası da, avtonomiyası da, hepsicü bittiydi”.

Başkaları korkardılar bu iştan tutunmaa. Kimileri da, ani şimdi Gagauziya-da başta bulunêrlar hem ofiêrliklän üünerlär “Bucak” batalyonuna girmää teklifä korkak cuvabı verärdilär: «*в сепаратистских формированиях я не служу!*».

Vani BURGUDJİ sa korkmardı. Onuştan gagauzluk hem Gagauz Respublikası için çalışmalarını hem “Bucak” batalyonunun kurulmasını Moldova kuvetleri ona prost etmedilär, hemen 1989-da kapana attılar. Ama halk bire-bir kalkındı da kuvet yoktu ne yapsın – İvan BURGUDJİyi 6 aydan sora serbest braktılar. Sora taa kaç kerä gagauzlar hem gagauzluk için İvan BURGUDJİ kapana düştü: 1990-da (6 aya), 1991-dä, 1992-dä onu çaldılar da 64 gün gözleri baalı pençeresiz bir odada tuttular, 1995-tä, 1996-da, 1997-dä, 1999-da, 2002-dä, 2006-da. Hepsi bu işlär gagauzluk için oldular gagauzların eni istoriyasında.

Gagauz Respunlikasını kurmaa deyni, halklararası zakonnara görä läâzımdı devletlik simvollarını kabletmää – Milli Gimnayı, Bayraa hem Gerbı. Da 1990-cı yılın Orak ayın (iyül) 22-dä olan Gagauz Halkın Kongresi bu simvolları kabletti. Sora da, 1990-cı yılın Harman ayın (av-gust) 19-da Gagauz Respublikasının kurulmasını dünneyä bildirdi.


Ozaman Gagauz Respublikasının juridika statusunu hazırlamaa deyni İvan BURGUDJİ, başka yuristlärlän barabar, binnärlän dokument, üzlärcä zakon inceledi, inandırmaa deyni Kişinevu hem Halklararası kuruluşları, onnara gagauz devletliini kablettirmää deyni.

Kişinev Gagauz Respublikasını tanımaa istemäzdi. Moldova işi avtonomiyaya götürmää başladı. İvan BURGUDJİ ilkin dedi, ani “*diil läâzım kayıl olmaa avtonomiyaya*”, “*läâzım Gagauz Respublikasını kablettirmää*”. Ama onu ozamankı “liderlar” işitmää istemäzdi, zerä onnar artık satılmışlar da gagauzlara karşı merkezdeki kuvetlerä hem KGBya izmet edärdilär, alıp kendilerine takma ad “*kidala*”, “*feogen*”, “*tamerlan*” hem başka.

Ama oldu ne oldu. Gagauzların adından “*liderlar*” avtonomiyaya kayıl oldular. Da avtonomiyanın erinä bizä taa da düşük status verdilär – özel avtonom-teretorial kuruluşu.

Nicä da olsa “Gagauziya (Gagauz Yeri) özel hak statusu Zakonu hazırlamaa läâzımdı. Da genä İvan BURGUDJİ bu işä koşuldu da juridika kanonnarına hem halklararası haklara görä o Zakonun statyalarını hazırladı komisiyaya, sora da Moldova parlamentına kablettirdi.

Açan 1994-cü yılın Kırım ayın (dekabri) 23-dä kabledildi “Gagauziya (Gagauz Yeri) özel hak statusu Zakonu hepsi sevindi – gagauz devleti hem gagauzluk yaşayacak. Ama yokmuş neyâ sevinmää. Eni kurulan Gagauziya (Gagauz Yeri) özel avtonom-teretorial kuruluşunda



kuvedä geldilär komunist rejiminä izmet edennär. İlkin ne onnar yaptılar – başkan G. TABUNŞÇİK imzaladı bir karar, anısına görä kiyatta yok etti Gagauz Respublikasını. **Gagauzların devletlik için savaşması boşa gitti!**

Bununnan hiç bir kerä kayıl olmadı İvan BURGUDJİ da te artık 18 yıl o dooruluu aslıya çıkarmaa savaşêr. Bu üzerä dä merkez kuvedi hem onun erindeki izmetçileri onu bunca yıl kırmaa çalışêrlar. Ama kıramadılar.

Kıramadılar, zerä İvan BURGUDJİnin tarafında dooruluk hem aslılık. **Zerä o – Adam!** O hepsinä hem herkerä aslıyı hem dooruluu söleer, **o aslıya hem doorulaa izmet eder.** O üzerä dä kuvettä bulunannar onu sevmeeirlär hem kuvedä kolvermeerlär, bakmadaan ona, ani gagauzlar İvan BURGUDJİyi çok kerä Gagauz Respublikasının hem avtonomiyanın organnarına ayırdılar. O oldu **Gagauz Respublikasının Üüsek Sovetinin deputatı** (1990-1994), **Gagauz Respublikasının içişleri Bakanı** (1992-1993), **Gagauziyanın Halk Topluşunun juridika bölümün başı** (2001-2003), 1999-cu yıldan beeri **Gagauziyanın Pridnestrovyada temsilcisi** olarak işleer.

Bän çok yıllar bilerim Vani BURGUDJİyi. En zor vakıtlarda onun yanında bulundum. En zor vakıtlarda o bana arka oldu.

İsteerim okuyucularımız bilsinnär taa bir iş. Herliim İvan BURGUDJİ olmaydı gagauzlarda en aazdan üç türkü da bekim olmayaceydi: “**Bucak**” **batalyonun marşı** (bu türkünün sözleri oldu sora Gagauziya Milli Gimnanın temel sözleri), “**Yaşa, Halkım!**” hem da “**Gagauziyaya Gimn!**” Bu üç türküyü o bana yazdırdı. Ama bu bir başka tema. Onu başka kerä bekim açıklaycam.

PATRETLERDÄ: (3-cü sayfa) **İvan BURGUDJİya karşı GAGAUZLUK KABAATI** için sudlar: 1989-cu yıl (yukarda); 2003-cü yıl (aşaada).

Todur ZANET,
Gagauz Respublikasının
kurucularından birisi,
Gagauziya Milli Gimnanın avtoru.

ENİ PEETLERDÄN

Büün seftä başlêêrız rubrikayı “Eni peetlerdän”. Onun ilk musaafiri poet Todur ZANET.

*İpsiz baaladın beni kendinä.
Nasıl dönärim kendi evimä?
Belliki kalêrım burda şüpesiz.
Eter ki bakasın maavi gözümä.*

BİR DÜŞ

*Gelärdi o bana karşı:
Gaytan gibi kara kaşı,
Dartıylan örtülü başı,
Parmacında üzük taşı.
Boynusunda var lefîleri,
Bileklerde – blezikleri.
Kız basması belceezindä,
Hem al gülcüz elceezindä.
Saçlar kara, gözlär kara,
Attı bakışını bana.
“Ya dur, Mari Kızçaz!- dedim.-
Sän temirä gibi geldin!”
Gülümseyip, baktın aşaa,
Da yollandın gitmää aşaa.
Kaldım yalnız bu sokakta –
Dübüdüz aar yalnızlıkta.*

BÄN – BÄNİM!

*Bizim poetlara
Birinä “Esenin” deerlär – eriyer.
Öbürü dä “Blok”muş – baylêr.
Filan – “Puşkin”mış,
Fişman – “Göte”ymiş,
Nestä – “şeymiş”, bilmäm “neymiş”...
Bän sa bänim –
Gagauz kökümdänim!
Beni ölä sän zannet –
bän Todur Zanet.*

*Üfkelenip, çıkıp gittin. O gün
omuzumda kaldı ükün.
Bu ayazda,
ateşlerdän beter,
Yanêrım bän, yanêr fener.
Poyrazlardan gelän gecä
Hiç brakmêêr şans bizä, güzä.
Kış kapattı pek ansızdan,
Kaldık Gazeta hem da bän.
Sän üfkeli çıktın.
Bunda benim salt kabaatım.
Seni severim, işimi brakıp,
Ama... bendä hiç kalmadı vakıt...*

HAYVANNAR PEETİ

*Koyunnar geçer üstümüzdän,
Dana gibi gözlermişä bakıp:
ne anırmak!
ne grohlamak!
ne da üürmək!
Seläm hiç yok – salt innemäk,
Hem da
Kendi-kendilerini hep şişirmäk.
Bakarkan onnara şaşêrsın pak:
Üstü kıvrak, gölmek ta pak,
Ama... alltan çıkêr kalak,
Aazdan akêr zehir, yalan –
Bunnar izlär yalaklardan,
ahırlardan....
Gözlär – bom-boş, makar gülär –
Çiiner bizi o öküzlär,
Geçip üstümüzdän,
Basıp topuklara,
Ezip parmak...
Onnar sanêr bizi ahmak,
Annamêêrız neyin nesi:
Kimdä insan,
Kimdäsaydı hayvan sesi...
31.03.2011. Kişinev-Komrat yolunda.*

GHTda 35 DEPUTATLAA 165 KANDİDAT VAR

Ceviz ayın (İsentabri) 9-da Gagauziya Halk Topluşuna seçimnär olacek. Bu günä bir ay kaldınan, Gagauziya Halk Topluşuna seçimnerinä kandidate yazılması bitti.

Gagauziyanın Merkez Seçim Komisiyası (MSK) bildirdi, ani Halk Topluşun 35 deputatlık erinä 165 kandidate registratıya yapıldı (81 kandidate – baamsız; 84 ta – partiyalardan hem cümne kuruluşlardan).

Taa ileri Gagauziyanın Merkez Seçim Komisiyasının (MSK) başı Svetlana MIRONOVA açıkladı, ani Halk Topluşuna seçimnerini yapmaa deyini para etişmeer. Bu para konusu da büünkü günden çözülmedi. O üzerä seçimnär hep taa şüpä altında kalêrlar.


XXX OLİMPİADADA MOLDOVADA 2 MEDALİ

Angliyanın başkasabasında geçän XXX-cu yaz Olimpiada oyunlarında Moldova 2 bronza medali aldı. İkisi da ştangada.



İlkin medaliyi karılar arasında 53 kg kategoriyasında kazandı Kristina YOVU. O iki denemedä 219 (99+120) kg kaldırdı.

İkinci medaliyi kazandı Anatoliy KIRIKU, 94 kg kategoriyasında – 407 (181+226) kg.



Bu medalilər için iki sportçuya da devlet tarafından 70-şar bin Euro premiya verilecek hem birär 2 odalı kvartira baaşlanacak.

XXX-cu yaz Olimpiada oyunlarına katılan 204 devletin arasından Moldova 75-ci oldu – 2 medali.

En çok altın medali burada kazandı ABD (Amerika Birleşik Devletleri) – 104 (46 altın, 29 gümüş, 29 bronza). İkinci oldu Kitay 88 (38, 27, 23), üçüncü – Büyükbritaniya – 65 (29, 17, 19), dördüncü – Rusya – 82 (24, 26, 32). Türkiye 32-ci – 5 (2, 2, 1).

N. KAPAKLI EVROPADA 2-ci OLDU!

Harman ayın 1-7 günnerindä Ukraynanın Dneprodzerjinsk kasabasında 100-şaşki oyununda gençlär arsında XIV-cü Evropa çempionatı oldu.

Burada pay aldı 240 sportsmen (1993-2003 yıllarda duuannar) Azerbaycandan, Belarusiyadan, Belgiyadan, Estoniyadan, Franñiyadan, Gollandiyadan, İtaliyadan, Latviyadan, Litvadan, Moldovadan, Polşadan, Rusiyadan hem Ukraynadan. Moldovadan bu Çempionata katıldı Gagauziyanın genç sportspeni, dünnä Çempionatın gümüş medalinin saabisi Nikolay KAPAKLI (treneri – Andrey ÇEŞMECİ).

XIV-cü Evropa çempionatın “Evropa umutları (Çocuklar)” kategoriyasında Nikolay KAPAKLI ikinci eri hem kuboo aldı.

Not. Bu çempionatta pay almaa deyni Gagauziyadan sportsmena sponsorların birisi oldu Afanasiy KIVIRCIK.



VIRCIK, Komrattaki “Banca Sociala” bölümünün başı.

PATRETTÄ: Nikolay KAPAKLI hem Afanasiy KIVIRCIK.

DOSTLAA BİR ANMAK TAŞI KOYULACEK

Gagauziyanın Kirsovo (Başküüyü) küüyündä seftä bir skulptura koyulacek. Bu skulptura – gagauz hem bulgar milletlerin Dostluu anmak taşı.



Bölä büyük işi, nicä düşer gagauzlara hem bulgarlara meciylän yapêrlar. Meciyä iki primariya hem başküülülär katılêrlar. Kirsovo (Başküüyü) küüyün

primarı Sergey SAPUNCI bu işi ölä açıkladı: **“Karar küüyün sovetindä alındı. Skulptura için kanarayı baaşladı Komrat primariyası. Paranın yarısını küüyün primariyası verecek, ikinci payını da – küülülär toplayacak.”**

Skulpturanın avtoru – Vitaliy MANJUL, anılmış gagauz resimcisi, skulptoru, poeti hem kompozitoru. O bildirdi, ani skulpturanın temelindä iki milletin 200 yıllık dostluu durêr. Skulptura için annadarak Vitaliy MANJUL deer: **“Bu skulpturada – bir auç içindä uşak – can simvolu. Aucu yapan ellär – iki milletin simvoludur.”**

Gagauz hem bulgar milletlerin Dostluu anmak taşını küüyün merkezindä kuraceklar. Onun ofițial açılışı Harman ayın 28-dä olacek, açan Kirsovo (Başküüyü) kendi kurban Gününü kutlayacak.

GİRİŞTÄ İKİ DİREK KALKTI

Gagauziyanın Kişinev tarafından girişindä, Gagauziyanın anılmış arhitektura simvolun arkasında iki direk kalktı.

Bu direklerä Moldovanın hem Gagauziyanın bayraklarını astılar. Direklär arhitektura simvolun görüntüsünü biraz bozdular, ama politika tarafından uygun olaceklar hem patriotika duygularını üüseldeceklär.

Akınıza getireriz, ani Çiçek ayın (aprel) 27-dä Kişinevda 34 metralık direktä 3,5x7 metralık bayrak kaldırıldı. Sayılêr, ani Kişinevdaki bayrak direenin kaldırılmasına 3 milion ley harlandı.



O gündän birkaç ya taa ileri Gagauziya Başkanı adadıydı, ani tezdä Gagauziyada üüsek direktä kaldırılacak büyük bayrak. Ölä nicä var deyecez Bakuda (Azerbaycan. Burada bayrak diräü 162 metra, bayrak ta – 35x70 metralık).

Nicä açıklandı, Gagauziyanın girişindä bayrak direklerin kaldırılması, Kişineva bakarak, 33 kerä taa ucuz çıktı.

UNIONİSTLÄR İKİNCİLÄÄ GEÇÄMEDİLÄR. BU KERÄ BELTÄ.

Orak ayın (iyül) 22-dä Moldovanın Kaul kasabasında Romıniyaylan birleşmää isteyän unionistlär kendi ilk marşını yapmaa savaştılar. Ama ozaman onnara karşı insannar kalktılar da izin vermedilär bu iş olsun.

Şindi dâ Harman ayın (avgust) 5-dä hep bölä bir marş unionistlär savaştılar yapmaa Moldovanın poyraz kasabasında Beltä. O “unirea marşını” hazırladı “Acțiunea-2012” asoñatıyası.

Bu kerä dâ onnara karşı binnän insan kalktı. Bu insannarın arasında Gagauziyadan da gelän üz kişiya yakın insan vardı. Unionistlerä karşı kalktılar beltlılar, komunistlär partiyası, soñalistlar partiyası, “Moldova



patriotları”, soñial-demokrat partiyası, “Pariya regionov” partiyası, rus gençlerin Ligası.

Belť kasabsında uniunistlerä karşı

mitingti yapıldı. O mitingta komunist partiyasından Moldova Parlamentın gagauzka deputatı İrina VLAH urguladı, ani **“mitinga toplandılar onnar, kim sayêrlar Moldova Respublikasını ortak bir ev hepsinü burada yaşayan milletlerä deyni, ama diil salt etnik romınlara deyni”.**

Unionistlär kasabaya girdiinän, büyük kavgalar olmasın deyni, iki taraf arasına poliñiya koyuldu. Ama bu da yardım etmedi. Kimi erlerdä açıktan düüş oldu. Yaralı da var – “Jurnal TV” korespondenti Viktoriya OCARÊnın tepesinä taş urdular.

Son sonunda poliñiya pindirdi unionistleri iki avtobusa da Belť kasabasıdan dışarı çıkardı.

Harman ayın (avgust) 6-da Moldova içişleri ministrusu Pavel RECEAN bildirdi, ani poliñiya Belťtaki olaylarlan ilgili olarak aaraştırmalar açtı.

“ANA SÖZÜ”Gagauz dilindä gazeta
Çikêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basılêr
Tiraj – 5500 ekz. Sımarlamak No: 6671.

YAZIŞMA ADRESİMİZ:
RM – 2028, Moldova, Kişineu,
c/p Nr. 1025. Tel/fax: 28-18-04

e-mail: todur.zanet@gmail.com
zanet@anasozu.com